



Inatsisartunut ilaasortaq  
Michael Rosing, Demokraatit  
/Her

**Tunngaviusumik Inatsisissaq pillugu Isumalioqatigiisitaq pillugu § 37  
naapertorlugu apeqquteqaammut nr. 2017-039-imut akissuteqaat**

Asasara Michael Rosing

Ulloq 18. januar 2017 Tunngaviusumik Inatsisissaq pillugu Isumalioqatigiisitaq  
pillugu apeqqutit arfinillit Naalakkersuisunut apeqquteqaatigaatit.

Apeqqutit uannut akisassanngorlugit innersuunneqarput. Inussiarnersumik  
takukkit akissuteqaatit matuma kingulianiittut.

**1. Isumalioqatigiisitap oqaatsit suut atorlugit sulinissaat Naalakkersuisut  
takorloorpaat?**

Isumalioqatigiisitaq oqaatsit suut atorlugit sulissanersoq, Tunngaviusumik  
Inatsisissaq pillugu Isumalioqatigiisitap nammineerluni aalajangissavaa. Tunngaviusumik Inatsisissaq pillugu Isumalioqatigiisitamut taassumalu  
allattoqarfianut 2017-imut aamma 2018-imut 5,5 mio. koruunit  
immikkoortinneqarput. Aningaasanut inatsimmut nassuaatit iluanni  
ingerlanneqartillugu Isumalioqatigiisitap aningaasassat taakkua qanoq  
pingaarnersiuiffigissanerai Naalakkersuisut susassaqarfinginngilaat. Taamaattoq  
tamanna kissaatigineqarpat nutserisoqarnissamik neqerooruteqartarneq,  
Namminersorlutik Oqartussani aamma Inatsisartuni ileqquuvoq.

Tamatuma saniatigut "Kalaallit Nunaanni inatsisinut tunngaviusussanut  
isumalioqatigiisitamik pilersitsinissamut nalunaarusiaq"  
innersuussutigisinnavaara, tassani allassimavoq:

*"Isumalioqatigiisitami oqaatsit qularnanngitsumik tassaassapput kalaallit  
oqaasi. Kalaallit oqaasii Kalaallit Nunaanni pisortatigoortumik oqaasiupput.  
Ilmanarlunnarpoq nunap aaqqissuussaaneranut aqunneqarneranullu  
maleruagassanik tunngaviusussanik pingaartumik suliaqarneq aamma nunap  
aaqqissuussaaneranut aqunneqarneranullu maleruagassanut tunngaviusussanut  
missingersuusiorneq aallaaviatigut kalaallisut ingerlanneqassasoq. Danskisut  
nutserisoqassaaq, kisiannili isumalioqatigiisitami sulinerup oqallinnerullu  
annertunersaa oqaasertaliussanut tunngasuussallutik aamma  
aalajangersimasutigut oqaatsitigut oqaasertalersuinerit isiginiarneqassallutik,  
taamaattumik tamanna oqaasertanik allannermi toqqaannartumik  
peqataasussanut atorfiliinnut kalaallisut oqaaseqarnissamut  
piumasagaateqarfiusalluni. Tamanna isumaqanngilaq isumalioqatigiisitami  
peqataanissamut kalaallisut oqalussinnaasariaqartoq, kisianni*

Allakkat ulluat:  
30-01-2017  
Suliap nr.  
2017 - 1639  
Akt. nr.  
4393341

Postboks 1614  
3900 Nuuk  
Tlf. (+299) 34 50 00  
Fax (+299) 34 54 10  
E-mail: npann@nanaq.gl  
www.naalakkersuisut.gl

*pisinnaanngikkaanni oqaasertanut tunngasunik kalaallisut oqallinnermi qanoq annertutigisumik peqataasoqarsinnaaneranut paasinartumik killeqassalluni.”*  
(qupp. 18)

*”Naatsorsuutigineqarsinnaavoq oqaatsit atorneqartut annerusumik tassaassasut kalaallit oqaasi, Namminersorneq pillugu kalaallit danskillu isumalioqatigiisitaanni oqaatsit marluk atorneqarsimallutik, isumalioqatigiisitami tassani ilaasortat kalaaliullutillu danskiummata.*

*Allannerup taaguusersuutillu annersaat kalaallisuijussapput tamannalu atorfilinnut oqaatsitigut piumasaqarfíulluni. Oqaasertanut tunngasunik sulinermi, amerlanertigut oqaaseqatigiit ilusaat aamma taaguutit kalaallisut atorneqartut pillugit oqallittoqarfiusussani, allattoqarfímmi oqaatsitigut piginnaasaqarnissamut tamanna piumasaqaateqarfíussaaq. Taamaattorli isumalioqatigiisitap allattoqarfíata aamma ataatsimiinnerit nalaanni toqqaannartumik nutserisutigut pitsaasumik atugassaqarnissaq isumagissallugu.”* (qupp. 31)

## **2. Isumalioqatigiisitap suliassai sorpiaappat, ilanngullugu ataatsimiittarnerit akuttussusissaat aamma angalasarnissat?**

Tunngaviusumik Inatsisissaq pillugu Isumalioqatigiisitap nammineerluni aalajangertussaavaa suliassat sorpiaassanersut, ilanngullugit ataatsimiittarnerit akuttussusissaat aamma angalasarnissat aalajangersarnissaat.

Tamatuma saniatigut ”Kalaallit Nunaanni inatsisinut tunngaviusussanut isumalioqatigiisitamik pilersitsinissamut nalunaarusiaq” innersuussutigisinnaavara, tassani allassimammat:

*”Isumalioqatigiisitap sulinini nammineq aaqqissuutissavaa, tassunga ilanngullugu suleqatigiisssitanik pilersitsisoqarsinnaanera.”* (qupp. 23)

## **3. Sooq Naalakkersuisut isumaqarpat partiit Inatsisartuni ilaasortanik taamaallaat Isumalioqatigiisitamut ilaasortanngortitsisinhaassasut?**

Tunngaviusumik Inatsisissaq pillugu Isumalioqatigiisitami ilaasortat aamma Inatsisartuni ilaasortaassasut, ”Kalaallit Nunaanni inatsisinut tunngaviusussanut isumalioqatigiisitamik pilersitsinissamut nalunaarusiaq”-mi inassuteqaatinit aallaavigineqarput.

Imatut nassuaammi allassimavoq:

*”Inatsisinut Ataatsimiitaliami 2015-imi inassuteqaammi uparuuarneqarpoq inatsisinut tunngaviusussanut isumalioqatigiisitami Inatsisartuni partiit tamarmik sinniisuutitaqarnissaat pingaaruteqartoq.*

*Namminersorneq pillugu kalaallit danskillu isumalioqatigiisitaanni Inatsisartuni Folketingimilu ilaasortat ilaasortatut toqcarneqarput. Taakku innuttaasut sinnerlugit inuit oqartussaaqataanerisigut toqcarneqarsimammata aamma taakku inatsisiliortuummata. Kalaallit Nunaanni namminersornerup eqquunneqarnera annertuumik inatsisikkut sulinerusimavoq, tassanilu inatsisartut sulinerup taassuma ingerlannissaanut toqqaannartumik inuit*

*oqartussaaqataanerannik piginnittuullutik.*

*Inatsisartuni ilaasortat nunap aaqqissuussaaneranut aqunneqarneranullu maleruagassanut tunngaviusussamut missingersuutip pilersinniarnerani sulinermi peqataasimappata missingersuusiamut piginnittuunermi misigineq annertunerussaaq. Oqaasertat pillugit eqqarsaasersuuteqarnermi peqataasimassapput tunuliaquitaasullu ilisimassallugit, taamaalillutillu kingornaakuersiniarluni sulineq ajornannginnerussallutik.” (qupp. 23)*

**4. Naalakkersuisut partiinut allagaanni erserpoq isumalioqatigiisitami ilaasortassatut partiit inassutigisaat Naalakkersuisunut saqqummiunneqartussaasut Naalakkersuisunillu akuerineqarlutik. Suna tunngavigalugu Naalakkersuisut isumaqarpat akuersinissamut pisinnaatitaassallutik imaluunniit Isumalioqatigiisitami partiit ilaasortassatut inassutigisaannik itigartitsisinhaassallutik, partiit nammineerluinnarlutik pisinnaatitaaffeqarmata Inatsisartuni sorleq ilaasortassatut inassutigissallugu kissaatiginerlugu?**

Ilumoopoq Tunngaviusumik Inatsisissaq pillugu Isumalioqatigiisitaliami ilaasortat ataatsimiititaliaagallartup, "Tunngaviusumik Inatsisissaq pillugu Isumalioqatigiisitaq pillugu Ataatsimiititaliaq", tusarniarneqareernerani Naalakkersuisut akuerisussaagaat. Taamaattoq partiit ilaasortaatitassatut inassuteqaataasa Inatsisartuni ilaasortaanerat aammalu paatsoortoqarsimannnginnissaa qulakkeerniarlugu naammassineqartussaammat.

**5. Kalaallit Nunaanni Saammaasseqatigiinnermut Isumalioqatigiisitanik pilersitsinissaq pillugu nassuaammi, 2016-mi ukiakkut ataatsimiinermi agguanneqartumi inassutigineqarpoq, Saammaasseqatigiinnissamut Isumalioqatigiisitami siulittaasussaq toqqarneqassasoq Naalakkersuisuni partiit annersaannit kiisalu siulittaasup tullia toqqarneqassasoq illuatungiliuttuni partiit annersaanni. Tassani ilisimatitsissutitut allakkami, partiinut nassiunneqarnikuusumi, erserpoq Naalakkersuisut aalajangersimasut siulittaasussamik siulittaasullu tullianik toqqaassasut partiit annersaat marluk. Suna tunngavigalugu Naalakkersuisut aalajangerpaat allannguutissaq taanna?**

Innuttaasut eqqarsaatigineqarnissaat aammalu eqaatsumik sulianik ingerlatitsinissaq, Inatsisartuni partiit anginersaasut marluk Tunngaviusumik Inatsisissaq pillugu Isumalioqatigiisitalimi siulittaasumik aamma siulittaasup tullianik toqqaassasut pillugu aalajangernermi pingaartinneqarput. Taamaaliornikkut nunatsinni partiit anginersaasut marluk – innuttaasut amerlanersaannut sinnisaasut – inissismaffinni pingaernerpaani marlunni inissinnissaat qulakkeerneqarpoq. Tamannalu aamma isumalioqatigiisitap sulinerata sunniuteqarluartuunissaata qulakkeernissaanut iluaqutaassaaq.

**6. Saammaasseqatigiinnissamut Isumalioqatigiisitanut tunngatillugu maannamut takusimasatsinni erserpoq aalajangeeqataasinnaanatik peqataasussat isumalioqatigiisitat siulittaasoqarfianit toqqarneqartassasut. Isumalioqatigiisitat siulittaasoqarfia naalakkersuisunit qinerneqartarnerat eqqarsaatigalugu taava illuatungiliuttut sunniuteqarsinnaanngillat isumalioqatigiisitamut nammineq**

**ilaasortaatitaqarnerup saniatigut. Naalakkersuisut isumaqarnerlutik tamanna demokratimi pitsasumik ileqkoqarnissamut tulluartoq?**

"Kalaallit Nunaanni inatsisinut tunngaviusussanut isumalioqatigiisitamik pilersitsinissamut nalunaarusiaq", isumalioqatigiisitaliami siulittaasoqarfik taaseqataasinnaanatik peqataasartussanik aalajangersimasunik marlunniq toqqaassasoq siunnersuuteqarfiusoq malinniarnagu Naalakkersuisut aalajangerput. Naalakkersuisut aalajangerput, Naalakkersuisut Tunngaviusumik Inatsisissaq pillugu Isumalioqatigiisitaliamut taaseqataasinnaanani aalajangersimasumik peqataasartussanik 2-4 -inik toqqaasinnaasut aammalu Tunngaviusumik Inatsisissaq pillugu Isumalioqatigiisitaliaq taaseqataasinnaanani peqataasartussanik marlunniq toqqaasinnaasoq. Tunngaviusumik Inatsisissaq pillugu Isumalioqatigiisitaliamut siulittaasoqarfiusoq tamatuma kingorna, isumalioqatigiisitaliap taaseqataasinnaanani peqataasartussanik toqqaanera pillugu Naalakkersuisunut ilisimatitsissuteqarnissaq suliassarissavaa. Tunngaviusumik Inatsisissaq pillugu Isumalioqatigiisitaliap qanoq iliorluni taaseqataasinnaanani peqataasartussat marluk toqqassaneraat isumalioqatigiisitap nammineerluni susassaqarfingaa.

Inussiarnersumik inuulluaqqusillunga

Suka K. Frederiksen